



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Reziaun Espesiál Oecusse-Ambeno (RAEOA)
11 Outobru 2017

Suku Usitakeno rekomenda ba JSMP atu hanaruk tempu ba treinamentu tanba materia sira ne'e importante tebes ba comunidade iha suku sira iha area rural

Iha 26 Setembru 2017, ekipa *Judicial System Monitoring Programme (JSMP)* halo treinamentu ba xefe suku no estrutura Konsellu Suku nian, inklui membru comunidade balun iha Suku Usitakeno, Postu Administrativu Oesilo, Rejiaun Autónoma Espesiál Oecusse-Ambeno (RAEOA).

Total partispante ne'ebé partisipa iha formasaun ne'e hamutuk ema na'in 30 ne'ebé kompostu hosi mane na'in 14 no feto na'in 16. Maioria hosi partispante ne'e mai hosi membru Konsellu Suku ne'ebé kompostu hosi xefe suku, xefe aldeia, lia-na'in, no delegadu sira hosi aldeia.

Objetivu husi treinamentu ne'e maka atu habelar informasaun no hasa'e koñesimentu partispante sira-nian kona-ba demokrasia, knaar órgaun soberanu sira-nian, partispasaun públiku iha proseu halo lei no asesu ba justisa formál.

“Treinamentu ba autoridade no membru sira Konsellu Suku nian ne'e ho intensaun atu kontribui ba promove sira-nia koñesimentu ba asuntu sira ne'ebé importante no relevante realidade no konstestu sosial no politiku, nune'e bele tulun sira atu hala'o sira-nia knaar ho di'ak, efetivu no efisiente, liu-liu kona-ba oinsa sira bele trata asuntu ka problema sira ne'ebé mosu iha sira-nia comunidade laran,” dehan Diretór Ezekutivu JSMP, Luis de Oliveria Sampaio.

Materia ne'e fahe ba iha sesaun rua. Sesaun dahuluk ko'alia kona-ba demokrasia, knaar órgaun soberania sira-nian no partispasaun públiku iha prosesu halo lei no sesaun daruak kona-ba asesu ba justisa formál.

Kestaun no preokupasaun partispante sira nian iha sesaun dahuluk nian mak kona-ba lei suku no mós lei kona-ba pensaun vitalísia. Relasiona ho kestaun sira ne'e, JSMP fó-hanoin ba partispante sira kona-ba importánsia partispasaun comunidade sira-nia partispasaun iha prosesu halo lei. Nune'e, públiku bele hato'o nia hanoin bainhira lei ne'e sei iha prosesu hela. Bainhira promulga no publika ona iha Journál Repúblika no vigora ona, ida-ne'e sei rekere esforsu barak no tempu naruk atu hadi'a fali.

Xefe Suku Usitakeno, bainhira taka formasaun ne'e, konsidera materia sira ne'ebé JSMP fornese ne'e importante no útil ba sira-nia servisu loroloron iha suku nian. Tanba ne'e, nia rekomenda atu JSMP bele aumenta tan tempu ba formasaun ne'e, nune'e ema barak bele asesu ba informasaun sira ne'e.

Xefe suku mós husu ba nia membru sira atu bele hatutan tan informasaun sira ne'e ba membru comunidade seluk ne'ebé la partisipa iha formasaun ne'e.

Atividade ne'e realiza tanba hetan apoiu finanseiru husi Fundus Sosiadade Sivil, Gabinete Primeiru Ministru.

Atu hetan informasaun kle'an favór kontaktu:

Luis de Oliveira Sampaio
Diretór Ezekutivu JSMP
Telefone: 3323883 | 77295795
Website: www.jsmp.tl,
E-mail: info@jsmp.tl
Facebook: www.facebook.com/timorleste.jsmp
Twitter: @JSMPTl